

rogativa, *Paradiso scilicet, non Inferis deversurus*. Fuerit etiam Patres, qui Adami Paradisum in Cœlo situm censuere.

Quod in præsentia nosse proderit, communior antiquorum semper sententia fuit, per *Paradisi* nomen, utpote adinventum ad significandam quemlibet amœnitatis, Felicitatisque locum, in novi Testamenti Libris designari Animarum statum in Beatitudine Cœlesti; atque in eo sensu ab omnibus fere Christi Fidelibus nunc etiam usurpatur. Si Tertulliani ipsius verba non perfunctorie expendis, perspicies, jam tum complures e Christianorum schola censuisse, non solum Patriarchas & Prophetas adductos in Paradisum a Christo ascendente in Cœlum, sed & reliquis Justorum Animabus patere post mortem beatam illam Regiam, ipsorumque Patriarcharum consortium. Immo, inquit, (ita Christianos alios sibi reponentes Tertullianus inducit) *dormitio nostra in Paradiso, quo jam tunc & Patriarchæ, & Prophætæ, appendices Dominicæ resurrectionis, ab Inferis migraverunt*. Porro Sanctus Cyprianus, uti infra ex ejus Libro de Mortalitate, heic reducendo, edisces, apertissimè *Paradisum & Regnum Cœlorum unum idemque putat, & beatissimam hanc Sedem singulis Justis sperandam statim a morte affirmat. Amplectamur diem, inquit, qui assignat singulos domicilio suo: qui nos istinc ereptos, & laqueis secularibus exsolutos PARADISO RESTITUIT, ET REGNO COELESTI*. Quid autem hoc nomine indicatum censuerit Chrysostomus, is nobis edisserat Homil. 79. ad Populum Antiochenum. *Latro, inquit, in cruce distentus, paucis verbis COELESTE REGNUM est assequutus*. Rursus ille in Concione de Lazaro: *Abraham necdum erat IN PARADISO, quia necdum Christus intraverat cum Latrone. Crux Christi clavis est. Crux aperuit PARADISUM. Nonne nobis dixit, quod REGNUM COELORUM non patitur, & violenti rapitum illud? Et Crux & STATIM PARADISUS: sed magnitudo pœnarum facit magnitudinem Præmiorum*. Ita in Homil. de Cruce & Latrone: *Latro AD PARADISUM inducitur. Christo non injuriæ fuit, sacram ingredienti Patriam, facere ingressus sui Latronem participem. Quum publicanos & fornicarios AD COELORUM REGNUM introduxit, non Cœlorum Regnum infamavit, sed etiam magis honoribus ampliavit, ostendens talem Dominum Regni esse Cœlorum, qui & indignas tantum meliorari fecit personas, ut etiam illius dignitatis GLORIAM merebantur*. Anastasii quoque Synaitæ verba sunt in Oratione de Sacr. Synax. Tom. I. Canisii: *Latro ille cum Christo crucifixus, homicida erat: at Judas, Apostolus & Discipulus erat. Intra exiguum temporis spatium mutatio accidit. Latro IN REGNUM ingressus est. Discipulus in interitum ruit. Sanctus Hilarius Tract. in Psalm. I. num. 9. agens de Ligno, quod plantatum est secus decursus aquarum illudque appellans Lignum Vitæ; hoc est Sapientiam, ait plantatum juxta decursus aquarum, in possessione scilicet REGNI DEI, idest IN PARADISO. Illic enim plantatum hoc lignum est, quo Latronem illum, se Dominum constituentem, Dominus, qui Sapientia est, introduxit, dicens: Amen dico tibi: Hodie mecum eris IN PARADISO. Ubi vides, Paradisum accipi-*